

## Pentekonta



## SABATHA MANTSIBOEA

### Bakeng sa Beke ena, Bala:

Liketso 2:1-4, Johanne 14:16, Liketso 2:5-13, Joele 2:28-32, Liketso 2:22-39, Pes. 110:1-3.

### Temana ea Khopolo:

“Molimo o tsositse Jesu eo; ’me rōna kaofela re lipaki tsa taba eo. Eitse hobane a phahametsoe letsohong le letona la Molimo, a nke pallo ea Moea o Halalelang ho Ntat’ae, o qhatsitse seo le se boneng, le se utloang joale” (Liketso 2:32, 33).

**P**entekonta” e tsoa lentsoeng lena pentēkostē, lebitso la se-Gerike bakeng sa mokete oa se-Juda oa libeke (Exoda 34:22); hape o tsejoa e le mokete oa lithakangoaha (Num. 28:26). Lentsoe leo le bolela “mashome a mahlano” ’me le nkiloe tabeng ea hore mokete o ne o ketekoa letsatsing la bo mashome a mahlano ho tloha letsatsing la ho tsokotsa ngata letsatsing la pele ka mora paseka. E ne e le letsatsi la thabo le teboho, ha bana ba Israele ba tlisa ka pel’a Morena “lilopotsia tsa kotulo ea koro” (Exoda 34:22).

Mokete oo eaba pontšo e lokelang ea kotulo ea pele ea semoea ka hara kereke ea Bokreste, ha Moea o Halalelang o ne o tšolleloa ka khaphatseho e fetisang, ’me batho ba likete li tharo ba kolobetsoa ka letsatsi le le leng (Liketso 2:41). Ho latela nyolohelo ea Jesu le ho nkeloa ha hae leholimong, tšollelo ena ea Moea e ile ea ba ketsahalo e fetisang matla a botho ho fetola Baapostola ho tloha ho batho feela ba tloaelehileng ba ba-Galelea ho ba isa ho banna ba sebete ba kholiseho ba neng ba tla fetola lefatše.

Pentekonta ha ngata e bitsoa tsoalo ea kereke, nako eo balateli ba Jesu, Bajude’me (ha morao) Balichaba, ba ileng ba tiisoa hore ke ba sechaba se secha sa Molimo lefatšeng.

*\*Ithute thuto ea beke ena ho lokisetsa Sabatha, 14 Phuptjane.*

## Ho tla ha Moea

Kutlong ea taelo ea Jesu, balumeli ba ile ba lula Jerusalema bakeng sa tšepiso ea Moea, 'me ba lula thapelong ka ho tiea, pako e tiileng, le thorisio. Ha letsatsi leo le fihla, “ba ne ba lutse bohle nğalong e le 'ngoe” (Liketso 2:1), mohlomong phaposeng e kholoanyane e kaholimo ea Liketso 1. Hafinyane, leha hole joalo, ba tla fetela libakeng tsa sechaba (Liketso 2:6–13).

**Bala Liketso 2:1–3. Ke litho life tse kaholimo ho botho tse ileng tsa felehetsa tšollelo ea Moea?**

---



---



---

Ketsahalo e ne e balehisa meriri. Pele ho ile ha ba kle molumo o tsoang leholimong o kang oa sefelo se matla o ileng tlala sebaka seo, ea nto ba ho kang malakabe a mollo a ileng a luba holima bohle ba moo. Mangolong, moea le mollo hangata li amahanngoa le “pono-molimo” kapa ponahalo ea matla a Molimo (ka mohlala, Exoda 3:2, 19:18, Deut. 4:15). Holima moo, moea le mollo li ka sebelisoa ho emela Moea oa Molimo (Johanne 3:8, Matt. 3:11). Boemong ba Pentekonta, ho sa natsoe moelelo hantle oa ketsahalo, e ne e le matšoa oa lelekellang motsotso o ikhethang nalaneng ea pholoho, tšepiso ea tšollo ea Moea.

Moea e sa le o ntse o le tšebetsong. Tšusumetso ea oona ho bana ba Molimo nakong ea Testamente ea Khale hangata e ne senoloa ka tsela e bonahalang, empa e se ka ho phethahala. “Nakong ea Bapatriareka tšusumetso ea Moea o Halalelang hangata e ne e senoloa ka mokha o hlakileng, empa e seng ka ho phethahala. Ha joale, ka kutlo lentsoeng la mopholosi, barutuoa ba ile ba fana ka merapelo ea bona bakeng sa mpho ena, 'me leholimong Kreste a tlatseletsa ka bokana-lipakeng ba hae. A kopa neo ea Moea, hore a tle a e tšollele bathong ba hae.”—Ellen G. White, *The Acts of the Apostles*, p. 37. Johanne mokolobetsi o ile a bolela kolobetso ena ea Moea ka ho tla Mesia (Luka 3:16; bapisa le Liketso 11:16), 'me Jesu ka sebele o supa ho eona ka makhetlo a 'maloa (Luka 24:49, Liketso 1:8). Tšollelo ena e tla ba ketso ea hae ea pele ea bobulelli ka pel'a Molimo (Johanne 14:16, 26; 15:26). Ka Pentekonta, tšepiso e ile ea phethahatsoa.

Leha kolobetso ea Moea ka Pentekonta e ne e le ketsahalo e ikhethileng e amanang le tlhoho ea Jesu sefapanong le ho nkeloa leholimong, ho tlala ka Moea ke maiphihlelo a lokelang ho phetoa-phetoa khafetsa maphelong a balumeli (Liketso 4:8, 31; 11:24; 13:9, 52; Ba-Efese 5:18).

**Ke bopaki bofe boo u nang le bona ba tšebetso ea Moea bophelong ba hao?**

## Neo ea Maleme

Ho Liketso 2:4, neo ea moea e ile ea bohanatsoa ka ho bua ka maleme. Empa, neo ena e ne e le e 'ngoe ea tse ngata tsa moea (Liketso 10:45, 46; 19:6). Tse ling li kenyeletsa ho bolela bokamoso (Liketso 11:28), lipono (Liketso 7:55), puo e susumelitsong (Liketso 2:8, 28:25), pholiso (Liketso 3:6, 12; 5:12, 16), le ho tlotsetsoa bosebeletsi (Liketso 6:3, 5). Neo ea maleme ka Pentekonta ha e ea ka ea hlaha hobane e ne e fetisa ka bohlokoa kapa e le bopaki ba neo ea Moea. E ile ea bonahatsoa e le ho thakhola thomo ea kereke ea ka lefatše lohle. Ke hore, pitso e fanoeng ho Liketso 1:8 e ne e hloka neo ea maleme. Ha e ne e ba Baapostola ba ne ba lokela ho tšela meeli ea bochaba 'me ba fihlele lipheletso tsa lefatše ka evangeli, ba ne ba tla hloka hore ba bua ka lipuo tsa bao ba hlohang ho utloa seo ba se bolelang.

**Bala Liketso 2:5–12. Ke bopaki bofe ho supang hore ka Pentekonta Baapostola ba ne ba lipuo tse neng li le teng ka nako eo?**

Ho hakanngoa hore ngoaha-kholong ea pele e-ne e ka ba Bajude ba limillione tse robeli ho isa ho tse leshome ba neng ba phela lefatšeng, 'me ke ba ka fihlang mashomeng a tšeletseng lekholong ba neng ba lula kante ho naha ea Judea. Empa, boholo ba ba neng ba le Jerusalema bakeng sa mokete, ba ne ba tsoa linaheng tsa Balichaba 'me ba ne ba sa bue se-Aramaic, puo ea Badujea Judea ka nako eo. Ha ho tika-tiko hore ba bangata ba ba ileng ba sokoloha ka Pentekonta e ne e le Badujeho tsoang linaheng tse ka mathoko bao joale ba neng ba ka utloa evangeli ka lipuo tseo ba tsoaletsoeng ho tsona. Hore barutuo ba buile ka lipuo tse teng tsa Balichaba, e seng ka puo e sa tsejoeng, ho pakoa ke lentsoe dialektos (Liketso 2:6, 8), le bolelang puo ea sechaba se itseng kapa tikoloho e itseng (bapisa le 21:40, 22:2, 26:14). Ho hlakile hee, hore ba ne ba bua ka lipuo tsena tse fapakaneng. Mohlolo e ne e le hore le ba-Galelea feela tjena, joale ba ka bua ka puo eo, lihora pejana, baneng ba sa e tsebe. Bajude bao ba lehae bao e ileng ea ba lipaki tsa sena, ba ne ba sa tsebe lipuo tsena, tlhaloso feela e ka utloahalang e ka ba hore Baapostola ba ne ba tahiloe, ba bua melumo e makatsang e neng e sa etse kelello ho bona. “Empa ba bang ba soma, ba re: ‘Ba khotše veine e tsoai’ ” (Liketso 2:13).

**Tšenolo e matla ea Molimo e etsahala ka pel'a mahlo a bona mona, 'me batho batho bana ba nahana hore feela ke ketso ea botaha ? Ke joang re ka bang hlokolosi hore re se ke ra fofala semoeng le rōna?**

## Thero ea Petrose

Qoso ea botahoa ea fa Petrose monyetla oa ho hlalosa se neng se etsahala. Puong ea hae, moapostola pele a supa mangolong (Liketso 2:16–21), a hlalosa tšollelo ea Moea e le phethahalo ea boporofeta.

**Bapisa Liketso 2:17 le Joele 2:28. Ke joang Petrose utloisang nako ea ho phethahala ha boporofeta ba Joele?**

---

Boporofeta ba Joele bo ne bo bua ka bokamoso ba nako ea topollo (Joele 2:32), e neng e tla bonahatsoa ka matšoa a 'maloa lefatšeng la ba utloang le ho tšolloa ha Moea (Joele 2:28–31). Ka ho toloka ketsahalo ea Pentekonta ka leseli leo la boporofeta, Petrose o ne a rerile ho tiisa ho amana ha ketsahalo eo le nalane. Empa ho na le phapano ea bohlokoa ka tsela eo a qotsang Joele. Ho e-na le selelekela sa Joele “Ka mor’a tseo” (Joele 2:28), se supang ka kakaretso ho bokamoso, Petrose o re “mehleng ea bofelo” (Liketso 2:17), ho bolelang hore ketsahalo ea ho qetela paleng e kholo ea topollo e qalile. Sena, ruri, ha se tlhaloso e phethahetseng ea liketsahalo tsa letsatsi la ho qetela empa bopaki ba ho potlaka ho hoholo ho khethollang kereke ea pele. Ba ne ba sa tsebe hore na bofelo bo tla neng empa ba ne ba kholisehile hore bo ke ke ba lieha.

**Bala Liketso 2:22–32. Ke ntlha efe ea bohlokoa e kholo ea evangeli puong ea Petrose?**

---

Ka mora ho senola bohlokoa ba ketsahalo ea Pentekonta boporofeteng, Petrose a fetela liketsahalong tsa nako eo tsa bophelo, lefu le tsoho ea Jesu. Ke tsoho, leha hole joalo, e ileng ea fumana tiiso e kholo, joalo kahae ne e emetse ntlha e fanang ka kemo nalaneng ea evangeli. Ho Petrose, tsoho e ne e le phetsetso ea ho qetela ea Jesu (Liketso 2:22, 27), 'me o qotsa mangolo ho thusa ho tiisa ntlha ea hae ka se boleloang ke tsoho. Hobane Jesu e ne e le Mesia, o ne a ke ke a tšoaroa ke lefu. Joale ho Petrose le lingoli tsohle tsa Testamente e Ncha, tsoho ea Jesu e bile bopaki bo matla, e seng feela ba Jesu e le Mesia empa bakeng sa molaetsa ohle oa Bokreste oa pholoho.

**Ka lefu le re potileng, le re tšosang kamehla le baratuo ba rōna, hobaneng tsoho ea Jeso e le 'nete e bohlokoa ha kaalo?**

## Ho Phahamisoa ha Jesu

**“Eitse hobane a phahamisetsoe letsohong le letona la Molimo, ’me a nke pallo ea Moea o Halalelang ho ntat’ae, o qhatsitse seo le se bonang, le se utloang joale” (Liketso 2:33).**

Karolong ea boraro ea puo ea hae, Petrose o khutlela tabeng ea maleme, e neng e hapile thahasello ea batho pejana. Ho e-na le hore e be ba tahiloe, e leng se neng se tla be se makatsa ka hora ea borobong hoseng (Liketso 2:15), balumeli ba ne ba bua ka maleme hobane Moea o halalelang o ne o sa tsoa tšolleloa ho bona ho tsoa leholimong.

**Bala Liketso 2:33–36. Ke khokahano efe lipakeng tsa ho phahamisetsoa letsohong le letona la Molimo le ho tšolloa ha Moea?**

---



---



---

Letsoho le letona la Molimo ke boemo ba matla (Ps. 110:1–3). Khang ea Petrose, eo a ipapisitseng le mangolo, ke hore ke ka hoba Jesu a phahamiselitsoe boemong boo leholimong a ileng a tšollela Moea holima balateli ba hae. Ho phahamisoa hoo ha ha ka ha nea Jesu boemo boo a neng a se na bona pele (Johanne 1:1–3, 17:5). Empa, ho ne ho supa kananelo e phahameng ea Ntate e le Morena le mopholosi (Liketso 2:36).

Ketsahalo ena hantle e re tlisa ho e ’ngoe ea lihloho tsa bohlokoa mangolong: toantšano e kholo lipakeng tsa botle le bobbe. Taba ke hore Moea o ne o ke ke oa tla ha e ne e ba Jesu ha a ka a phahamisoa (Johanne 7:39), ’me Jesu o ne a ke ke a phamisoa ha e ne e ba ha a ka a hlola sefapanong (Johanne 17:4, 5). Ka mantsoe a mang, ho phahamisoa ha Jesu e ne le pehelo ea hotla ha Moea hobane ho ne ho bontša kananelo ea Ntate ea seo Jesu a se fihletseng sefapanong, ho kenyetsa le tlhlo ea ho ikhapela Borena ba lefatše lena (Johanne 12:31).

Ho kena ha sebe lefatšeng ho entse seriti se itseng ho Molimo. Lefu la Jesu le ne le hlokeha, e seng feela ho lopolla batho empa hape ho lefeletsa Molimo le ho pepesa Satane e le moqhekanyetsi. Bosebeletsing ba Jesu, mongoaha oa topollo o ne o so ntso le tšebetsong (Luka 4:18–21). Ha a ne a leleka matemona kapa ho tšoarela libe, o ne a lokolla batšoarua ba Satane. Empa, e ne e le sefapano se neng se tla mo fa matla a phethahetseng ho etsa joalo. Joale, ha sehlabelo sa Kreste se netefalitsoe leholimong, Satane o ne a otliloe ka setebele sa ho qetela, ’me Moea o ne o tšolleloa ho lokisetsa batho ho tla ha Kreste.

## Litholoana tsa Pele

Bamameli ba Petrose ba hlajoa lipelong ke mantsoe a hae. Ba bang ba bona e ka 'na eaba ba ile hara bao ba neng ba ba kopile thakhiso ea Jesu libeke pejena (Luka 23:13–25). Empa joale, ba susumetsoa ke hore Jesu oa Nazaretha ruri e ne e le Mesia ea boletsoeng, ba ithoala meli hloohong: “Re tla etsa joang?” (Liketso 2:37).

### **Bala Liketso 2:38. Ke lipheho life tse peli bakeng sa tšoarelo?**

Pako e bolela phetoho ea hang-hang tseleng ea bophelong, ho furalla sebe (Liketso 3:19, 26:20), ho feta feela boikutlo ba tšoabo le ho ikoahlaea. 'Moho le tumelo, pako ea 'nete ke neo ea Molimo, empa joalo ka lineo tsohle, e ka latoloa (Liketso 5:31–33, 26:19–21, Ba-Roma 2:4). Ho tloha nakong ea Johanne mokolobetsi, pako e ne e amahanngoa le kolobetso (Mareka 1:4). Ke hore, kolobetso ea e-ba sesupo sa pako, tšebeletsong e tšoantšang tlhatsuo ea libe le nchafalo ea boitšoaro e hlalisoang ke Moea o Halalelang (Liketso 2:38, 22:16; bapisa le Tite 3:5–7).

### **Bala Liketso 2:38, 39. Ke tšepiso efe e fanoang ho ba bakang ba bile ba kolobetsoa?**

Batho ka Pentekonta ba ne ba sa fuoe feela tšoarelo ea libe empa hape le botlalo ba Moea molemong oa kholo ea bona ea semoea, besebeletsi ka kerekeng, hape ka ho khetholoha le thomo. Sena mohlomong e ne le tlhohonofatso e fetang tsohle, hobane lebaka le leholo le kerekeng e leng teng ka lona ke ho arolelana litaba tse molemo tsa evangeli (1 Pet. 2:9). Joale, tabeng ena ho ea pele, ba tla ba le tiisetso ea topollo le matla Moea o Halalelang, o tlang ho ba nea bokhoni ba ho phetha thomo kerekeng e bitsitsoeng.

**Hobaneng temoho ea hore re na le “tšoarelo ea libe tsa lōna” e le bohlokoa bakeng sa bohle ba batlang ho phatlalatsa evangeli? Hantle, ke tšepo efe eo o ka e neang ba bang ho Jesu haeba uena u se na eona?**

---



---



---

## Ho Ithuta Haholoanyane:

Ho tšolleloa ha Moea o Halalelang ka Pentekonta ho senotse 'nete e mahlonoko ka se etsahetseng leholimong le ka moo Molimo Ntate a a mohetseng sehlabelo sa Krete kateng bakeng sa libe tsa lefatše. Tšollelo ea Moea e botšitse, hape, hore mosebetsi oa Krete leholimong bakeng sa rōna, ho ipapisitsoe le sehlabelo sa hae lefatšeng, joale o hlomamisitsoe. Liketsahalo tsena tse hlollang ke litšenolo tse ngata tsa linnete tse molemo tsa hore leholimo le lefatše li hokahane ka tsela eo re ke keng ra utloisisa ha joale. “Nyolohelo ea Krete leholimong e ne e le pontšo ea hore balateli ba hae ba lokela ho amohela tlhohonolofatso e tšepisitsoeng. . . . ha Krete a feta ka likhoro tsa leholimo, o ile a hlomamisoa hara litlatse le khumamelo ea mangeloi. Hang hoba mokete ona o phetheloe, Moea o Halalelang oa theohela ho barutuo menono e phallang, 'me ruri Krete o ile a tlotlisoa, ka khanya eo a neng a na le eona pele le Ntate ho tloha bosahlaheng. Tšollelo ea Pentekonta e ne le puisano ea leholimo hore tlhomamiso ea molopolli e phethiloe. Ho latela tšepiso ea hae o rometse Moea o Halalelang ho tsoa leholimong ho tla ho balateli ba hae e le pontšo ea hore, e le moprista le Morena, o amohetse matla ohle leholimong le lefatšeng, 'me joale ke motlotsuo holima sechaba sa hae.”—Ellen G. White, *The Acts of the Apostles*, pp. 38, 39.

## Lipotso tsa Puisanop:

1. Ke eng ea Pentekonta eo kereke ea ka e lebellang bophelong ba eona kajeno? Ke eng se ka phethoang, ke sefe se ke keng sa phetoa?
2. Lula haholo tabeng ea hore Petrose o entse tsoho ea Jeso karolo e bohlokoa hoo ea molaetsa oa hae oa Pentekonta. Se entseng hore tsoho e be ntho e makatsang ka ho fetisisa ke hore ho sa natsoe litebello tsa bo-Mesia tsa Se-Juda tse neng li le teng ka nako eo, ho ne ho se ea lebelletseng hore Mesia a ka tsoha bafung. Seo se ne se se semoeng sa mang kapa mang; e ne e se seo ba neng ba lebeletse ho tla ha Mesia ba neng ba se hopotse. Ke lithuto life tseo re ka ithutang tsona moo ka moo re hlokanang ho tseba seo Bible e se rutang, khahlanong le lithuto tse tumileng tsa joale?
3. Liketso 2:38 e buile ka tlhoko ea ho kolobetsoa. Na se se bolela hore mang kapa mang ea lumetseng ho Jesu e be o shoa pele a kolobetsoa, o se a ntse a lahlehile? Buella karabo ea hao.